



Här Christian WELTER

Gemengeconseiller

43, avenue de la Gare

L-4873 LAMADELAINE

Referenz :2022.52356.SECR

Péteng, den 13. August 2022

Betreff: Är Froe vum 14. Juli 2022

(Den Dossier gëtt bearbecht vum der Madame Nancy Hermann - Tel. : 50 12 51 – 2055)

Här Christian Welter,

Per E-Mail vum 14. Juli hutt Dir dem Schäfferot folgend Froe gestallt :

Här Buergermeeschter, wäert Membere vum Schäfferot,

An der leschter Gemengerotssitzung krute mer d'Informatioun, dass aktuell iwwer 500 Persounen op de Waardelëschten hänken, fir hiert d'Kand kënnen an eng Maison Relais anzeschreiwen. Dobäi kommen nach eng Unzuel u Persounen, déi net op de Waardelëschten ageschriwwe sinn, well se de Sënn net gesinn iwwer Joren op eng Betreuungsplaz ze waarden. Mir si Fäll bekannt vu Familljen, déi eis Gemeng verlooss hunn, well se keng Aussicht op eng Betreuungsplaz méi kréien. Grad, déi, déi finanziell vun zwee Salairen ofhänken, sinn hei betraff.

D'Gemeng huet zwar aktuell zwou gréisser Maisons Relais'en am Bau, mee bis déi komplett auslaaschtbar sinn, mussen vill Familljen nach e puer Joer duerhalen. Dëst ass awer net fair, well dës Bierger vis-à-vis vun deene benodelegt ginn, déi hier Kanner ab September elo gratis an eng öffentlech Betreuungsstruktur kënnen schécken. Als Gemeng sollte mer d'Verantwortung fir d'Fehlplanung vun de leschte Joren iwwerhuelen an den Eltere Léisungen an der aktueller Situatioun ubidden.

Esou wéi den Artikel 25 vum Gemengegesetz et virgesäit, wéilt ech iech an deem Zesammenhang eng Fro stellen:

- 1. Kann de Schäfferot nach eng Kéier präziséieren, wéi laang déi eenzel Waardelëschten an deenen eenzelnen Uertschaften hei an der Gemeng sinn?*
- 2. Wéi vill Platzen huet d'Gemeng aktuell a senge Maisons Relais'en an deenen eenzelnen Uertschaften?*
- 3. Wéi vill Platze wäerten duerch de Bau vun den neien Maisons Relais'en am Joer 2022 bäikommen? Wéi vill am Joer 2023? Wéi vill am Joer 2024?*
- 4. Wat gedenkt d'Majoritéit am Gemengerot z'ännerhuelen, fir den Elteren, déi op der Waardelëscht hänken, dëst Joer ze hëllefen?*
- 5. Wéi steet de Schäfferot zu der Iddi, fir den Elteren, deenen hier Kanner op der Waardelëscht ageschriwwe sinn, eng finanziell Ënnerstëtzung unzebidden?*
- 6. Wéi fënnt de Schäfferot Iddi, dass Elteren, déi ee schrëftliche Refus krute fir eng Plaz an enger Maison Relais, op manst d'Suen vum d'Mëttegiessen, dat je ab September och gratis gëtt, vun der Gemeng ausbezuelte kréien?*

*Mat Respekt,
Christian Welter
Gemengeconseiller*



Hei dem Schäfferot seng Äntwert op är Froen :

Insgesamt stinn aktuell eng 651 Kanner op eise Waardelëschten. Am Detail fir di eenzel Uertschaften sinn et 134 Kanner fir Lamadelaine, 234 Kanner fir Rodange an 283 Kanner fir Péiteng.

Aktuell huet d'Gemeng Péiteng insgesamt 608 Plazen. Opgedeelt pro Uertschaft mécht dat 60 Plaze fir Lamadelaine, 235 Plaze fir Rodange a 313 Plaze fir Péiteng.

Eng éischt nei Maison Relais mëscht hir Diere Mëtt 2023 zu Lamadelaine op. Hei ginn zousätzlech 180 Plaze geschaf. Zwou weider Maison Relais sinn an der Planung, wouduerch eng 400 zousätzlech Plaze geschaf wäerte ginn. Am Ganze ginn an den nächsten 3 - 5 Joer also eng 580 nei Plaze kreéiert.

Déi éischt Hëllef op deem Plang wäert déi nei Maison Relais zu Lamadelaine bréngen. Weiderhi mëscht sech de Schäfferot Gedanke fir zousätzlech Plazen an d'Liewen ze ruffen, ënnersträicht awer datt dëst hei zu Lëtzebuerg eng Rei Démarche mat laangwieregen Délaien mat sech bréngt. De Schäfferot weist och drop hin datt duerch Ännerunge vun de Gesetzestexter an de leschte Joeren d'Exploitationskonditiounen deelweis esou ëmgeännert goufen dass d'Zuel vun de schonn autoriséierten Plazen an eise Maison Relais erof gesat gi sinn.

Wann eng finanziell Ënnerstëtzung fir d'Elteren ugebuede soll ginn, misst dëst um nationale Plang geschéien, wat soumat ënnert d'Kompetenz vun der Regierung fält.

Mat frëndleche Gréiss,

De Gemengesekretär,

De Buergermeeschter,